

Sanguma bilong tude

Long taim bilong ol tumbuna na inap nau wanpela bikpela samting bilong pret tru, em i sanguma. Em i save kirap kilim yu long nait - long haus yet o taim yu wokabaut long rot o bus. Na yu no inap long kilim sanguma. Nogat. Sanguma man o meri em-i holim pawa tru long ples. Olgeta bikpela man i aninit long em. Na em i olsem tude yet.


Long yia i go pinis yumi bin wari na kirap nogut long planti pait i bin kamap nabaut long kantri. Em ol pait namel long sampela lain pipel ol i pait wantaim spia na banara na tamiok. Wan wan man i bin lusim laip long ol dispela pait. Tasol yu harim nau, olgeta spia na tamiok na banara bilong ol dispela paitman wantaim, i no bin kilim lain man inap long ol manmeri dispela wanpela sanguma.

Nau i luk olsem Papua Niugini i bin painim wanpela nupela sanguma inap long bosim olgeta sanguma. Long wanem, insait long

wanpela yia dispela nupela sanguma i bin kilim indai moa pipel olsem olgeta arapela sanguma man o meri wantaim. Na dispela sanguma em i yangpela boi yet; em i gat samting olsem 15 yia tasol. Tasol, man, em i save gro hariap moa moa yet.

Tasol sori, dispela sanguma i no gat birua. I luk olsem em i gat pren tasol long dispela kantri. I no gat man i pret long em. Nogat. Maski em i kilim yu, yu no ken tok egens long em.

Ating dispela em i pasin bilong ol tumbuna yet - ol i no inap kolim nem bilong sanguma. Em i tambu. Na mipela tu i no laik brukim dispela tambu. Hia long dispela pes mipela i no autim nem bilong em. Tasol yu ken painim planti stori long wok bilong dispela sanguma long pes 3 na pes 6 na pes 7 na sampela arapela pes insait long dispela niuspepa. Yu pret o yu inap?



Poto antap i soim Sir Tore Lokoloko i glasim gat oy ona bilong ol nevi long Canberra.

Daunbilo em i 5-pela memba bilong palamen bilong mipela i lukluk raun long haus ov asembli long

Melbourne.

Kirap long lephan yumi lukim Mista Roy Evera, na Mista Angmai Bilas, na

Mista Akoka Doi, na Mista Opai Kunangel, na Mista Sam Tulo.

Tupela poto wantaim i kar long Australian Information Service. Antap i bilong Ian Mitchell; daunbilo bilong Normant Plant.



wantok

National weekly in Melanesian Pidgin.

Editorial Offices:
P.O. Box 1982
Boroko

Phone: 25.2214
25.2552
Telex: NE 22213

Branch Offices:
Wewak
Phone: 86.2479

Wabag
P.O. Box 111

Advertising:
In P.N.G.
Ms. Penny Donald
Phone: 25.2214

In Australia:
Kevin Engel
8 Duraba Pl.
Caringbah (2229)
Phone: 525.6263

Subscription Rate:
Annual: K8.00



KARIM WARA LONG BILUM

I gat wanpela gutpela lapun mama i sindaun long ples. Em i laikim tumas kaikai buai, na sampela taim em i sindaun nabaut long paia na pulim smok long liklik paip bilong em. Mama ya, i no meri bilong toktok planti. Tasol wan wan taim em i save skrapim tok pilai wantaim ol yangpela. Em i save larim ol i trikim em liklik, tasol oltaim em i painimaut trik bilong ol. Ol i lap i go pas tasol lapun mama oltaim i lap las tru na i winim ol.

Wanpela taim lapun mama ya i sindaun i stap long ples kol aninit long ol tri long ples. Planti ol tumbuna pikinini i bin kam bek long haikul pa ol i kisim win nau. Ol yangpela manmeri i kamap i laik tok pilai long mama ya, na wanpela i kirap askim: "Mama, olsem wanem? Yu save go yet long haus lotu long Sande olsem bipo?"

"Yesa. Mi no ken lusim wanpela Sande."

"Orait, yu tokim mipela nau: tude long lotu, pasto i bin ritim wanem hap bilong Baibel?"

"Olaboi, mi no save gut? Mi lusim ting. Yu save, lapun het bilong mi i pas pinis."

"Tasol, mama ating yu mas save, Pasto i stori long wanem samting? Yu ting strong nau."

"Mi no save moa. Mi save tasol em i mekim gutpela toktok tru."

"Olaboi, mama, sapos yu no save pasto i tok wanem samting long lotu, bilong wanem yu go long lotu? Em i longlong. . ."

Lapun mama i no gat tok moa. I luk olsem ol yangpela i bin winim em. Orait, nau em i sanap na i tok "Yupela kam wantaim mi long haus kuk."

Kamap pinis, nau em i tokim wanpela boi: "Pikinini, yu kisim bilum bilong mi hia na go long baret na karim sampela wara i kam."

"Tasol, mama, mi no inap karim wara long bilum. Bilum em ol hul tasol ol i samapim."

"Maski, yu go mekim tasol. Mi laik soim yupela wanpela samting."

Orait yangpela boi i go long baret na i kam bek, na i karim tasol bilum nating i kam. Bilum i karamap long wara tasol "Em nau. Yu lukim, mama. Olgeta wara i ranawe pinis. Yu no inap karim wara long bilum."

"Yangpela yu harim, het bilong mi i wankain tasol. Em i no inap karim hap tok bilong pasto insait long en. Nogat. Olgeta tok i lus pinis" Em i lap liklik na i skruim tok i go, "Yes, em i tru, bilum i no holim sampela wara. Tasol yu bin putim long baret na nau em i kamap klin liklik."

Bosman na spakman

I no gat wanpela samting i bin bagarapim tru PNG moa olsem strongpela dring. Yu askim tasol ol dokta, ol nes, ol woda, ol plisman, ol pris, ol pasto, ol bosman bilong faktori, ol bosman bilong kain kain ofis.

Insait long 10-pela yia i go pinis, strongpela dring long PNG i bin kilim moa manmeri olsem olgeta spia na banara na masket na raifel wantaim. Strongpela dring i namba wan birua tru bilong dispela kantri.

Ol i bin painimaut olsem, long olgeta 100 man i wok long gavman o faktori o woksap insait long PNG 8-pela i bagarap long strongpela dring.

Long Port Moresby long mun Mas ol i bin putim wanpela kibung long tokaut klia na long ples klia long bikpela wari bilong strongpela dring. Ol i tok tu olsem wanem spakman i ken helpim em yet. Na bikpela samting: wanem samting ol bosman na hetman long gavman na kampani i mas mekim long spakman.

Hia mipela i givimaut ol lo, ol saveman bilong AA (Alcoholics Anonymous) i bin yusim inap planti yia pinis. Dispela sosaiti AA em i gat memba tasol i bin lus long alkohol o strongpela dring, na i bin kam bek gen. Na ol i save tru long ol wari na trik na gris bilong spakman. Na tu ol i save staim em gut, long wanem bipo ol yet i spakman tru.

Orait, em hia nau lo na skul na tok save bilong AA i go long ol bosman na hetman, i gat ol spakman i wok aninit long em:

OLSEM WANEM YU KEN SAVE WOKMAN I SPAKMAN?

- Em i save dring planti moa na spak nogut olgeta taim i gat pati bilong kampani, o bikpela selebren
- Planti taim em i no kam long wok, na em i no gat sik tru.
- Planti taim long Mande bihain long kisim fotnait, em i no stap long wok.
- Tingting bilong em i no stap long wok bilong em. Het bilong em i pas.
- Planti taim em i pun- daun o brukim samting o painim birua long wok.
- Samtaim em i spak long taim bilong wok yet.
- Bihain long kaikai long belo, planti taim em i kam bek bihaintaim tumas o i no kam bek olgeta long dispela de.

BOSMAN I MAS MEKIM WANEM LONG SPAKMAN?

- Bikpela lo bilong AA

em hia: Spakman yet i mas pilim na save na bilip em i lus tru long dring. Em yet i mas laik long pinisim dispela pasin nogut. Sapos em i no laik, olgeta tok na traim bilong yu i sutim graun nating.

- Yu no ken pretim em. Sapos spakman long laik bilong em yet i no laik pinisim pasin dring - yu na meri na dokta na arapela man i no ken helpim em.
- Yu tokim em: mobeta em i go toktok wantaim sampela man i bin gat dispela trabel tu, na ol i winim-pinis. Dispela em i AA grup. Olgeta bikpela taun i gat kain grup olsem. Yu ring tasol long Selveseh Ami, o long plis. Na ol i ken tokim yu. Dokta tu i ken tokim yu ol i stap we.
- Yu mas tok stret long em: em i spakman na sapos em i bihainim pasin dring bilong em, bai em i pinisitaime long wok bilong em. Em yet i mas bilipim dispela tok. Yu no ken

(i go moa long pes 6)

Oposisen painim lida

I luk olsem i gat nupela Nesenel Oposisen na Sir Tei Abal i no moa lida bilong en. Gavman na palamen i no bin tok orait long givim nem na namba long dispela nupela lain yet, tasol i luk olsem bai neks taim palamen i kibung long mun Me bai nupela oposisen i kamap tru.

Ol i bin votim Mista Iambakey Okuk (Simbu) lida bilong nupela oposisen. Ol Oposisen memba i bin vot long haus palamen long Mande, 20 Mas, na 16 memba i bin sambai long em.

Mista Okuk i tok, bai ol i givim dispela nem long nupela oposisen pati: Pipels Yunaitet Fran.

Hia em nem bilong olgeta man i bin sanap wantaim Mista Okuk insait long dispela nupela Pipels Yunaitet Fran: Mista Martin ToVadek (Gazelle), Sir John Guise (Milne Bay), Misis Waliyato Clowes (Middle Fly), Mista Michael Pondros (Manus),

Mista Sailas Atopari (Goroka), Mista John Jaminan (Yangoru-Saussia), Mista Justin Edimani (Esa'ala), Mista Konia Dewe (Kundiawa), Mista Wago Goiye (Kerowagi), Mista Talu Bolt (North Wahgi), Mista Galeva Kwarara (Rigo), Mista James Mopio

(Central), Mista Gerega Pepena (Abau), Mista Dambali Habe (Komo-Margarima), Mista Sevese Morea (Moresby South).

Ol dispela man i bin sanap long sait bilong Sir Tei Abal: Mista Opai

(i go moa long pes 18)



OL MERI PAPUA NA NIUGINI MAS WANBEL

Dia Edita - Mi gat liklik hap tok long putim i go long yupela.

Mi yet mi pilim ol Hailans meri, ol meri Niugini i go daun long Moresby long kos o wok, ol Papua meri i kros wantaim ol na mekim kain kain pasin, toktok baksait long ol. Em mi pilim i no gutpela pasin, ol i mekim long meri Hailans long ples bilong kos o ples ol i kam bung long kism save bilong wok na kirapim kantri bilong yumi.

Njugini meri o meri Hailans na tu ol meri Papua, olgeta i kam long bung na kism wankain save bilong gutpela sindaun bilong ol bihain. Tasol mi yet mi pilim, ol i no save sindaun gut wantaim.

Mipela man, Hailans na Papua i kam long wok hia, mipela i wanbel oltaim long wok na sindaun, na i gutpela olsem na i no gat bel nogut namel long mipela ol man. Dispela em mi lukim long wok bilong mi yet.

Dispela gutpela pasin, ol meri tu i mas bihainim na bung sindaun bilong yu wan wan i ken stap gut.

Const. Miamure Aina,
Karimui/Simbu.

STUAKIPA SLO TUMAS

Dia Edita - Mi gat liklik wari bilong mi long autim i go long ol stuakipa.

Ol stuakipa i no save sevim ol manmeri gut. Taim ol i lukim wanpela yangpela meri. Em ol i lusim ol man sanap wet long baim samting long stua na hariap tru i hap sait ol yangpela i kam insait bihain na long baim samting. Ol i giman long go klostu long dispela ol yangpela meri na toktok pilai na aigris long dispela meri.

Ol manmeri na pikinini i kam long pas long baim kaikai ya i sanap wet yet. Ol i sanap, sanap na lek i tait nating na ol i lusim i go long narapela stua na baim kaikai.

Ol stuakipa i no save tingting long sevim ol man long baim kaikai. Em i wanem kain pasin tru ya, ol stuakipa i save mekim long ol meri na lusim tingting long ol man long baim kaikai.

Yu wanem stukipa yu sanap long kaunta yu lukim dispela pas na pilim sem.

Robert Karo,
Lae.

SKUL MERI MARILAIM OL BOI

Dia Edita - Hia mi laik autim wari bilong mi i go olsem. Mi i no save long dispela samting. Taim mi i go long Heldsbach Tok Ples Skul na mi lukim dispela pasin long ai bilong mi na i no stret long mi. Na mi pret nogut tru long dispela samting.

I go olsem: Long Heldsbach Skul ol sumatin i stap em ol man wantaim ol meri i skul wantaim na taim ol i laik aut long kismas long dispela taim ol meri i save wokim kain kain marila long ol boi. Sapos wanpela meri i aigris long wanpela boi, orait em save marilaim dispela boi. Mi no save gut.

Ating em wanpela strongpela marila stret. Planti taim mi lukim long ai bilong mi stret. Ol marilaim ol boi na ol tarangu boi ya i wari nogut tru. Na krai olsem pikinini i save krai long kaikai na kolim papamama, kain olsem. Taim tarangu boi ya i go i stap long ples o wanem hap em bai tingim dispela meri yet.

Ol dispela lain meri i stap long Heldsbach. Wan wan long ol i gutpela i no save long dispela samting. Na sampela meri i pulapim

marila long kabot na basket olsem ol man stret. Na long dispela pasin tasol ol i rausim planti boi long skul.

Na mi lukim i no stret long mi. Olsem na bai yumi mekim wanem? Ol meri traim na yusim gutpela samting bilong tumbuna na lusim samting nogut bilong ol tumbuna. Em wari bilong mi tasol.

Yu husat brata o susa i laik bekim tok bilong mi, orait welkam tasol.

Garasa Ziwoqish,
Heldsbach/Lae.

Salim ol pas
i kam long:

WANTOK
BOX 1982
BOROKO

AHEBOU OL SUSA PAPUA

Dia Edita - Hia mi laik sapatim toktok bilong wantok bilong mi Miamure Aina, Awi bilong Simbu Provins. Yes mi ting em i tok tru ol meri bilong Papua no ken kros o wokim kain kain pasin o tok baksait long ol meri bilong Hailans o Niugini. Em i no gutpela pasin yupela ol meri Papua i save wokim.

Pasin bilong kirapim kantri, i no taim bilong kros, em i taim bilong wok wantaim. Yupela save dispela liklik tok ol i kolim AHEBOU em i min olsem wanem? Tingting gut, ol meri, wanpela meri o wanpela provins tasol inap kirapim kantri o nogat. Nating mi ting nogat tru.

So ol meri Papua, traim na wanbel wantaim ol susa bilong yupela long Hailans na Niugini.

Nating ol meri long Hailans na Niugini save prenim, ol man bilong Papua na yupela gat kros long dispela. Yupela ol meri long Papua laik prenim ol man long Hailans o Niugini em i welkam. Tasol yupela

save em i independen kantri. Laik bilong wan wan man wan wan meri.

Dispela em liklik tingting bilong mi olsem yupela ol susa save kros long yupela yet. Mipela ol man save brata gut na yupela ol meri olsem wanem? Sapos i gat narapela as bilong tok i wankain o mi tingting long en, orait mi laik wanpela Papua i mas bekim pas bilong mi na tok klia long mi wantaim ol susa bilong mi long Hailans na Niugini.

Em tasol mi gat long skruim pas bilong Awi bilong mi. Tenkyu tru.

Baltasa Nimbata,
Mt. Hagen.

MINISTA BILONG SIOS

Dia Edita - O yes ol wantok mi gat wanpela wari bilong mi olsem. Long lukluk bilong mi long ol sios bilong yumi long Papua Niugini i no stret tumas. Long lukluk bilong mipela ol sampela katolik i luk olsem olgeta kain kain sios bilong kantri bilong yumi i no gat minista tru.

Long olgeta dipatmen i gat minista tasol long wok bilong sios i no gat tru. Olsem na mipela i laik bambai gavman bilong PNG i mas wokim wanpela konstitusen bilong makim wanpela minista bilong sios bilong yumi long PNG. Olsem na bambai kantri bilong yumi i ken ran gut.

Sapos yumi i no gat gutpela sios insait long PNG, ating kantri bilong yumi bai bagarap liklik. Liklik taim bai ol waitman misineri i lusim yumi tasol i luk olsem kantri bilong yumi i yangpela yet na mipela i no gat inap misineri bilong mipela yet. Sapos ol i lusim yumi bagarap. Wok bilong PNG bai i nogut bikos i no gat minista i sanap sapatim wok bilong sios insait long PNG.

Em tasol liklik wari bilong mi. Mi wanpela katolik man insait long wanpe-

la misin ol kolim S.V.D.

Lukas Hauseng,
Tau/Is Sepik.

SPAKMAN STONIM GEREHU YC HAL

Dia Edita - Dispela pas mi laik autim liklik wari bilong mi i go olsem. Mi lukim planti spakman i kam bagarapim YC Hal long Gerehu.

Na plis yupela ol gutpela man, yupela mas ritim gut dispela toksave bilong mi. Nau dispela YC Hal em i samting bilong planti yangpela pipel i kam bung wantaim long amamas. Yu husat man o meri yu go dringim bia long hotel na yu pilim olsem yu spak liklik, orait plis yu no ken i kam danis long YC Hal.

Mi lukim planti spakman i kam bagarapim nabaut ol samting, brukim botol, na tromoi ston antap long rup, brukim simen na i no stret liklik.

Plis yupela ritim dispela toksave bilong mi na yu husat spakman i no ken i kam danis long Gerehu YC Hal. Em tasol likli wari bilong mi.

John Opi,
Gerehu/Port Moresby.

LAIKIM PEN PREN

Dia Edita - Mipela 6-pela sumafin bilong Kudjip Skul ov Nasing insait long Minj, W.H.P. Mipela i laikim pen pren long olgeta hap bilong graun.

Em hia nem na adres bilong mipela. Niyoto Sakasa (19), Leo L. Lare (19), John K. Kone (20), Tom Kepowe (20), Lem P. Waipukam (20), na Leo L. Landor (16).

School of Nursing
KUDJIP
P.O. Box 456
Mt. Hagen.

Sapos yu husat boi o gel i gat laik long raitim pas, orait plis traim na raitim long mipela long Pisin o Inglis tasol. Tenkyu.

BIRUA BIA

Trena bilong tupela namba wan man bilong boksen long PNG, em Tony na John Aba, i bin tokim mi olsem: "Olgeta man i laik tren long boksen em i mas tambu olgeta long smok na dring. Sapos em i brukim tambu inap tu taim samting, mi rausim em long kem bilong mi."

Sapos wanpela botol bia i sanap long tebol na yu no ken larim i stap, em i min dispela liklik botol i winim yu, em i moa strong olsem yu. Yu no sem? Yu kalabus long botol olsem dispela man daunbilo.

Sapos man i gat sik, tasol em i no laik yu stretim sik, em bai dai. I no gat marasin inap helpim em. We stap wanpela spakman long PNG i laik stretim dispela sik bilong dring?

Planti pipel tumas bilong Papua Niugini i slev long pasin bilong dringim bia. Bia i bosim ol; bia i masta bilong ol. Sampela pipel i bin tok olsem: Ol man bilong longwe ples i go pinis na nau mipela i kisim independens pinis na mipela i fri. Tasol lukaut: pasin bilong dringim bia em i no bilong hia, em tu i bilong longwe ples. I no samting bilong ol tumbuna. Na planti pipel i dringim bia, ol i no fri - ol i pas pinis, ol i kalabus pinis long en, ol i larim independens bilong ol.

Mista Bernard Narokobi, hetman bilong komisin bilong stretim ol lo, em i bin tok olsem: "Bikos mipela i fri nau, mipela i gat strong long bagarapim mipela olgeta. Tude i gat sampela PNG pipel i wok long klinim indai bodi bilong ol, bikos ol i laik bihainim pasin bilong waitman tasol."

Long wanpela buk bilong Olpela Testamen, em ol i kolim Provebs, i gat sampela tok i makim tru Papua Niugini tude. Tok i go olsem: "Wain (na bia na olgeta strongpela dring) i giman long strongim bel bilong ol man. Strongpela dring i kirapim pait. Ol dispela man i ful tasol, long wanem ol i larim strongpela dring i bosim ol, na em i mekim ol i wokabout longlong na pundaun nabaut long rot."

Ol Papua Niugini i mas opim ai bilong ol tasol na lukluk nabaut. Bai ol i ken lukim olsem wanem bia long dispela kantri i wanpela birua tru. Bilong wanem; Bikos:

- a.) Bia i pasim rot bilong go het bilong kantri.
- b.) Bia i bagarapim gutpela sindaun bilong famili.
- c.) Bia i as bilong planti birua long rot.
- d.) Bia i statim planti pait namel long ol pren.
- e.) Bia i pulim man long planti pasin nogut
- f.) Bia i pinisim planti mani - na i mekim planti famili i sot long kaikai na klos samting.

Yes, bia em i olsem wanpela birua i bin kam long wanpela ausait kantri na i tekewe pinis independens long laip bilong planti pipel bilong PNG.

Long nius long yia 1977 ol i bin ripotim ol dispela kain kain samting i bin kamap long pasin bilong dringim planti bia:

- a.) Provinsal Komisina bilong Saten Hailans i ripot olsem: "Sampela ofisa bilong gavman i dringim bia long taim bilong wok, na tu long de bilong fotnait na de bihain long en. Dispela pasin i bagarapim wok bilong pablik sevis."
- b.) Wanpela mejstret i bin salim wanpela man i go kalabus inap 3 mun, long wanem em i bin paitim het bilong meri bilong em long wanpela botol bia.
- c.) Ol plis long Maun Hagen i ripot, inap 17 taim sampela pipel i bin pait wantaim ol plis, na olgeta taim em ol sampela spakman o sampela lain man i helpim ol spakman tasol.
- d.) Long Bukapena long Westen Hailans ol spakman i kirapim pait namel long tupela lain, na 4-pela man i dai pinis long en.
- e.) Komisina Bilong Olgeta Plisman, Mista Pius Kerepia, i bin tok olsem: Ol plis ofisa bilong em long Hailans i ting, taim ol Hailans kopi fama i kisim mani bilong wok bilong ol, bai ol i lusim samting olsem 2 milion kina (K2,000,000) long baim bia insait long wan mun tasol.
- f.) Namba wan Jastis, Sir William Prentice, i tok olsem: Spakpasin long Papua Niugini i olsem dispela sik nogut ol i kolim kansa.

Sik kansa i save pinisim helt na laip bilong planti pipel moa. Bia tu i wankain, em i pinisim laip na helt na gutpela sindaun bilong planti pipel long PNG.

Olsem wanem yumi inap winim dispela birua i laik bagarapim laip na gutpela sindaun na independens bilong yumi wan wan long PNG? Yu mas givim bikpela



TOK NOGAT long bia. Em tasol. I no gat narapela rot. Maski ol arapela man i tok bilas o lap. Yu mas bosim laip bilong yu. Yu gat wanpela laip tasol - na em i bilong yu.

Sapos yu pilim yu no inap, God i sambai long helpim yu. Lukim Hibru 13:6 - "Bikpela em i save helpim mi. Mi no ken pret. Bai ol man inap mekim wanem samting long mi? No gat samting." Lukim Filipai 4:13 - "Dispela man i save strongim mi, long strong bilong em yet, mi inap mekim olgeta samting." Lukim Filipai 4:13: "Long strong bilong dispela pawa Krai i bin givim long mi, mi inap mekim olgeta samting."

Dispela stori i kam long niuspepa bilong Selvesen Ami, nem bilong em TOKAUT. Mista Geoffrey Maskelyne i bin rait.

EM NAU!

Wanpela man i hoim bikpela wok insait long wanpela dipatnen bilong gavman long Port Moresby em i namba wan man bilong soka, na i save trenim planti man bilong pilai soka. Dispela man i no save smok o dring bia.

Taim em i raun long Amerika long mekim wok bilong em, em i insait long planti pati liklik. Na sampela taim ol sampela man i kros long em, long wanem em i no kisim bia na wiski samting. Ol i save tok bilas long em olsem: "Olsem wanem? Ating yu bilong wanpela misin i save tambu long dring, olsem na yu no hoim bia samting."

Em i bekim tok: "Nogat. Misin i no tambuim mi long dring bia. Tasol mi man bilong spot, na olsem mi tambu long olgeta strongpela dring."

Arapela man i tok: "O, nau mi save. Yes, em i tru. Man i dring em i no inap kamap gutpela man bilong spot. Gutpela. Kas bilong yu. Yu man tru."

BOSMAN NA SPAKMAN

(i kam long pes 3)

mekim save long em. Sapos em i no laik go long AA o stretim spakpasin bilong em, liklik taim bai em i pinisim long wok bilong en.

BOSMAN NO KEN ISI TUMAS LONG SPAKMAN.

a.) Bihain yu toktok pinis wantaim spakman, yu makim stret taim bilong em i mas pinisim pasin dring bilong em.
b.) Sapos em i pret long go insait long AA, yu mas tokim em: Insait long dispela grup AA i gat olkain pipel: man na meri, wokman, bosman, dokta, pris, bikman bilong gavman. Olgeta bipo i stap spakman na i winim spakpasin pinis. Insait long dispela grup AA ol i no ting long namba na nem bilong yu, olsem na ol i kolim long tok Inglis: anonymous. Em i min yu no gat nem. Yu man tasol o meri.

BOSMAN MAS TOK WANEM LONG SPAKMAN?

a.) Tok stret. Yu no trik o mekim switpela tok nating. Na yu no ken paitim tok wantaim spakman long kain tok olsem: "Olgeta man i gat rait long dring, na em i samting bilong

em." Spakman i laik harim dispela kain tok na i laik bilipim.

b.) Yu no tokim em olsem: "Yu mas dring liklik tasol. Dringim bia tasol na maski bakadi na wiski." Spakman i bin traim ol dispela samting pinis na i no wok. Sapos yu tok: "Yu mas dringim 3-pela bia tasol," em i trik. Em i no stretim wanpela samting. Bihain long 3-pela bia, spakman i stap pinis long rot i wel tru. Em i no inap kam bek gen. Olsem dispela kain tok i gris long em tasol. I no save helpim em.

c.) Maski long traim pretim em na tok, sapos em i dring dring planti, bai bel bilong em i bagarap na i kuk na em i dai. Em inap painim wanpela ekşampel bilong wanpela man i dring planti na i go lapun tru. Na tok bilong yu i lus.

d.) Spakman bai gat planti toktok. Yu mas soim em olsem: olgeta trabel em i gat wantaim meri bilong em, wantaim ol tambu, wantaim ol pikinini, as bilong olgeta dispela samting em dring bilong em tasol. Em i sot long mani, em i oltaim hapim wok bilong em, as bilong dispela olgeta samting, em dring bilong em tasol.

e.) Yu mas tokim em stret: sapos em i no senisim pa-



sin dring bilong em, em i pinistaim long wok bilong em.

f.) Maski long salim spakman i go long dokta long traim painimaut watpo em i dring planti. Dispela i no helpim em. Em i laikim tumas save watpo em i no ken dring liklik, olsem planti arapela pipel. Tasol em i no laik lusim dring. Olsem dispela kain save i no helpim em.

g.) Sapos em i tok, em i save go long pris o pasto o dokta wantaim ol wari bilong em, na ol dispela man i no bin wari liklik long pasin dring bilong em, yu bekim tok olsem: Yu

no bin tokim ol long olgeta pasin tru bilong yu.

h.) Sapos em i tok olsem: bihain em i stretim ol wari wantaim meri na pikinini na mani, bai pasin dring bilong em tu i isi. Yu bekim stret: Nogat. Pastaim yu mas stretim pasin dring. Em i as tru bilong ol dispela trabel bilong yu.

WATPO SPAKMAN I PRET LONG A.A.

Yu mas stretim olgeta aidia bilong spakman long A.A.

a.) AA em i no grup bilong ol rabis spakman, o grup bilong ol pipel i tok-tok planti long God na ol i olsem holi samting. Nogat. Olgeta spakman i no rabisman na lesbaga tasol. Nogat. Yu kam long AA na yu ken bungim olkain pipel i bin lus long dring: ol dairekta bilong beng, ol trak draiva, ol pris, ol ofis meri, ol loman, ol dokta, ol maritmanmeri, ol bosman, ol wokman. Olgeta i bung wantaim long kisim strong na helpim long arapela pipel i gat wankain sik olsem ol yet.

b.) Ol AA i no save mekim bikpela promis long ai bilong ol arapela pipel. Nogat. Ol i traim tambu olgeta long dring inap wande wan de tasol. Ol i lain long pasin bilong lusim dring na mekim pati na hepi taim na stap belgut. Ol dispela pipel i no hetim strongpela dring. Nogat tru. Ol i laikim. Ol i laikim tumas. Tasol ol i skulim ol yet long pasin bilong stap

longwe long en.

c.) Orait, nau sapos spakman i orait long en, yu ken painim wanpela memba AA na em i ken kisim em i go insait long wanpela miting bilong ol. Ol Selvesen Ami i ranim ol dispela kain miting; ol dokta na pasto tu i save ol AA i stap we long hap bilong yu.

d.) Sapos spakman i no laik harim tok bilong yu, larim em. Inap em yet i laik stretim pasin bilong em, yu no ken helpim em. Em i mas laik bilong em yet.

GIVIM BEK WOK LONG SPAKMAN

Sapos wanpela man bipo em i spakman na em i bin winim tru sik bilong em, dispela man inap stap gutpela wokman tru. Dispela kain man i kisim save pinis: bipo em i bin raus long wok bilong em. Em i laik wok. Nau em i no dring moa, olsem yu ken save em bai mekim gutpela wok tru.

Long Olpela Testamen long wanpela buk bilong gutpela aidia (Proverbs) saveman i tok olsem: Sapos yu laik kisim gutpela ekşampel bilong wanpela samting i taitim bun tru long wok, yu lukim ol anis - ol i ran tasol long wok. Yes, em i tru. Tasol, ol anis i no wok tasol. Sapos yu wokim wanpela piknik o pati, bai ol anis i ran i kam tu - na bringim planti wantok i kam wantaim.



ROOK'S RADIO olkain gita, spika

P.O. Box 191, Lae. Phone: 42.4616

Et Pos

Odéli skul

Long mun Desemba yet long Katolik Misin haus sik long Timbunke long wara Sepik antap, 14 et pos odli i bin winim tu yia kos bilong ol na i bin kisim setifiket long han bilong Provinsal Helt Ofisa, Dokta, Kevin Farrell bilong Wewak. Na Mista Sari Wimban, Pablik Helt Ekstensen Ofisa, i bin givim medal o bes long wan wan.

Kos bilong ol dispela et pos odeli i no isi. Inap wan yia stret ol i bin skul long Timbunke na Sista Mary Anthida i bin bosim ol kos na stadi long komyuniti helt, helt bilong ol pikinini, pasin bilong helpim meri karim pikinini, glasim na stretim olkain sik na sua, pasin bilong ranim haus sik na komyuni helt, ol lo bilong wok dokta, na pasin bilong gutpela Kristen sindaun bilong et pos odeli. Bihain long dispela yia wan wan studen i bin winim 3-pela eksemisenen, na wan wan eksemisenen inap long 3 aua stret.

Orait, long namba tu yia ol i bin go wok nabaut na-

baut long wan wan et pos na hia ol i soim save bilong ol long wok tru olsem doktaboi. Na olgeta wan wan wik ol i bin mekim sampela spesel wok, na i bin ripot long en long Sista. Long las tri wik, ol i bin stap gen long Timbunke. Nau ol i redi long goaut long wok tru bilong ol.

Dispela wok bilong trenim et pos odeli i bin kirap long Timbunke long yia 1952 yet, taim Sista Fabiane i lusim kantri Saina na i kam long PNG na i statim dispela wok. Stat long dispela taim inap nau, ol i wokim pinis tupela bikpela haus sik, wanpela hetofis bilong mekim wok klinik, wanpela haus karim, bikpela haus kuk na haus waswas, haus skul bilong ol et pos odeli, haus slip bilong ol, na 5-pela bikpela haus bilong ol.

Long bikpela selebresen i gat planti bikpela man bilong helt dipatmen bilong Wewak na Angoram, ol kaunsila, na memba bilong palamen, ol Sista bipo i (i go moa long pes 18)



Poto antap i soim 14 Et Pos Odeli i bin winim tu yia spesel skul bilong ol long Timbunke. Kirap long lephan, long namba wan lain daunbilo yumi lukim: Herman Agarma (bilong Angoram, bai wok long Porapora), Godfried Mekina (bilong Dreikikir, bai wok long Ambes), David Gunuvi (bilong Maprik, bai wok long Amahop), Biyewhat Wanbis (bilong Dreikikir, bai wok long Yambes) Lukas Gobi (bilong Wewak, bai wok long Brandi). Long lain namel: Joseph Jime (bilong Ambunti, bai wok long Amaki), Hilary Paisua (bilong Wosera, bai wok long Nungwaia) Godfried Karum (bilong Angoram), na Alois Tochichem (bilong Maprik, bai wok long Ambonwari). Long lain antap em hetsisa Sista Mary Anthida na Jack Wanjak (bilong Karawari, bai wok long Yamanden), Jack Saunims (bilong But, bai wok long Walis Ailan), James Kwaru (bilong Angoram, bai wok long Kwaliangwa), na provinsal helt ofisa, Dokta Kevin Farrell.



Poto daunbilo i soim ol man i bin winim prai. Kirap long lephan long lain daunbilo, yu painim: Godfried Karum, Benny Young, Richard Manarkip, Kalen Kamban. Ol i sanap: Paul Parak, Sister Mary Anthida (het tisa bilong skul), Dokta Kevin Farrell (Provinsal Helt Ofisa), Pater Kerubim Dambui (Interim Primia bilong Is Sepik), Godfried Mekina.



WINIM MANI ISI TUMAS
 PAINIM NA KISIM OLPELA TAIA I KAM
 MIPELA DUNLOP I SAVE BAIM

LAE: Aircorps Rot - klostu long maket

BONEO PIKSA
 P.O. Box 217, Finschhafen

Boneo Piksa em i nambawan ples bilong yupela ken salim ol blak/wait film wantaim ol kala film i kam.

Boneo Piksa bai divelopim na prinim ol piksa na salim i go bek long yupela wantaim wanpela nupela fri film.

Sapos yu no gat kamera, yu ken baim wanpela long Boneo Piksa. Pe bilong en i no bikpela.

Sapos yu laik save moa long dispela wok, orait, salim pas i kam long:

Boneo Piksa, P.O. Box 217, Finschhafen.

laikim wanpela niuspepa moa

Mista Tom Koraea, Minista bilong Midia, em olkain wok nius na tok save long redio na prin, i bin tok long palamen em i ting long statim wanpela niuspepa moa. Em i laik dispela niuspepa i mas kamaut olgeta de olsem "Post Courier" na em i ting Opis ov Infomesen yet inap long ranim dispela niuspepa.

Mista Koraea i ting em i gutpela i gat moa niuspepa, olsem na ol i ken resis wantaim long kisim stretpela nius. Sapos wanpela niuspepa tasol i stap, em i save prinim wanem samting em i laikim. Sapos em i no laikim wanpela man o wanpela dipatmen o wanpela tok o wanpela samting, em i pasim maus tasol long en na ol rida i no save olgeta long en, o i save liklik tasol.

Mista Koraea i tok: sapos i gat moa niuspepa, ol pipel yet i ken skelim ol gut na ol pipel yet i ken baim niuspepa ol i laikim. Na em i ting Opis ov Infomesen - em hetkota bilong gavman bilong olgeta nius - em inap long wokim dispela kain niuspepa bilong olgeta de.

Em i tok, ol i gat planti save pinis, long wanem

inap long 20 yia ol i bin prinim "Our News" long tok Inglis na Pisin na Motu. Nau ol i save prinim 50,000 kopi olgeta fotnait. Em i tu taim moa kopi olsem "Post Courier", na tri taim moa olsem "Wantok". (Tasol - "Post Courier" i kamaut faiv taim long wik, na "Wantok" i kamaut wantaim long wik, na "Our News" i kamaut wantaim tasol long fotnait.)

I gat sampela man i ting, Opis ov Infomesen bai painim bikpela hevi moa long prinim na ranim wanpela niuspepa i kamaut olgeta de. Long olgeta kantri we gavman yet i ranim niuspepa, em i no save autim tru olgeta nius. Sampela em i pasin. Em i pret long raitim nius i egens tru long gavman, na i pret long prinim tingting bilong ol

man i no laikim gavman. Tasol niuspepa tru i mas givim tupela sait bilong toktok. Mista Koraea i tok bai long PNG i narakain.

Narapela wari em hia: inap nau gavman i bin givimaut fri olgeta 50,000 "Our News" na baim pos ofis na rot bilong em. Sapos nau em i stat long mekim ol skul i mas baim niuspepa, ating bai hamas skul inap? Na baim rot bilong en tu?

Narapela wari yet, em long prinim niuspepa i kamap olgeta de. Inap nau Opis ov Infomesen oltaim i gat bikpela trabel long prinim ol buk na pepa samting, long wanem woksap bilong prin o pres bilong gavman i pulap tru tru long wok bilong olgeta kain dipatmen bilong gavman. Ol samting i save kamap bihaintaim tumas. Olsem "Hansard" em i buk i tok save long olgeta samting ol memba i bin tok long palamen - dispela stori bilong namba wan kibung bilong nupela gavman, em long mun Ogas



Ating ol i hangre long nius tasol.

1977, em i no bin kamaut yet. Na sapos em i olsem, bai olsem wanem ol inap long prinim niuspepa olgeta de? Em bikpela wari tru bilong Minista. Tasol tingting na laik bilong em i strong.

Long Palamen Mista Koraea i bin askim ol memba long sapotim dispela tingting bilong em na tok orait long en, bai em i ken makim sampela save-man long glasim gut dis-

pela aidia bilong narapela nesanel niuspepa. Em i pinisim tok olsem: "Mista Spika, mi laik askim olgeta memba bilong dispela Palamen long sapotim long gutpela tok na long mani tu ol smolpela niuspepa bilong dispela kantri, olsem "Wantok", na "Lae Nius", na "Ailans Nius". Helpim ol bai ol i ken go het gut long mekim wok bilong ol long autim nius na olkain tok save long ol pipel bilong ples."



Strong Tru.

HUSKY DYNA

**Niupela trak bilong Toyota i save wok hat tru.
Yu laik karim kago o pasindia - long biktaun
o rot nogut long bus - dispela trak em inap.**

TOYOTA

BRANCHES
AT: PORT MORESBY LAE MT., HAGEN
25 4088 42 2322 52 1888

ELA MOTORS LIMITED

MADANG
82 2188

RABAU
92 1988

KIETA
95 6083

WEWAK
86 2255

GSP ET 013P

Stori Tumbuna :

watpo dok no save tok

Long taim bipo tru ol dok i save toktok. Na nau taim, nogat. Bilong wanem ol i no save toktok? Wanem as bilong tok? OK stori i go olsem.

Long bipo tru ol man na meri i mekim rong o stilim samting bilong narapela man, Oloman, i no save husat i bin stilim samting. Tasol i gat wanpela man i slip i lukluk i stap. Nem bilong em Dok. Long tokples bilong mi em Koluwi. Em dok yet i save tokaut long olgeta liklik samting ol man i mekim bipo.

Long wanpela de wanpela man i bin mekim trabel long wanpela meri. Tasol papamama bilong dispela meri i no save husat i bin mekim. Tasol dok wanpela i lukim pinis na em i tokaut. Na dispela man i bel hat nogut tru na em i tok. "Tru, a? Ol dok i

lukim samting na tokaut olgeta taim?"

Orait, em i go long bus em i kisim tret bilong kanda i kam long ples. Na em kisim ol dok na samapim maus bilong ol. Na tarangu ol dok i no inap toktok moa.

Olsem na yu save lukim ol dok i gat ol long pela gras long maus bilong ol. Olsem tu na olgeta dok i no save toktok.


Em tasol.

John Wisit
Torembi, (NO.1)

Sampela taim man i olsem, Mi laik dringim wanpela bia moa bilong strongim bel bilong mi lo long taim mi draivim trak. Tasol em i no strongim bel. Em i krungutim rot.



STORI BILONG TULTUL TITAN



PLANTI OL WANTOK LONG HAILENS I SAVE KAM LONG TITAN KAMPANI LONG LAE LONG BAIM BANIS WAIA. TASOL NAO OL I KEN BAI LONG DISPELA PLES:

BANZ
Farmers & Settlers

GOROKA
BP Stoa
Steamship Stoa
Summer Scales &
Lambert
Farmers & Settlers
New Guinea
Pastoral Supplies

KAINANTU
Jascar Ltd

MT. HAGEN

. BP (NG) Ltd
. N.G. Co. Ltd
. Steamship
. New Guinea
Pastoral Supplies

KUNDIAWA
Steamship Stoa
Namasu

MENDI
Sohi Gilsonan

WAPENAMANDA
Waso Ltd.

Titan (NG) Pty Ltd. P.O. Box 25 Lae Ph 423988, 423497

— BIKISO —

MANI PASIM MAUS

Mista N. Kiuchi, wampela bikpela man insait long gavman bilong Japan i tokaut olsem: "Olgeta wok bisnis bilong ol bikpela man na bikpela kantri tude i gat bikpela sik. Oltaim i gat moa na moa mani tasol dispela mani i lusim moa na moa hevi bilong em. I olsem wampela hap diwai em ol waitpela anis i kaikai insait bilong en. Bai em i pinis we?"

"As bilong trabel bilong olgeta pasin bisnis em i dispela: Bikpela bisnismen i no save tingting long ol pipel. Nogat. Em i tingting long ol namba tasol. Sapos namba i bikpela, em i laikim. Pipel, maski. Olsem na ol samting i paul nabaut. Yu no ken lukim sais bilong samting na tok em i gupela samting. Nogat. Planti gupela samting i smolpela. Pipel - wan wan manmeri - em i bikpela samting. Mani nogat. Bilip long God tasol inap long givim namba na nem long wan wan man long ai bilong ol arapela. Sapos yu lusim ting bilong God, yu lus!"

Minista Bilong Ol Midia, Mista Tom Koraea, i wari long wanem dipatmen bilong em i kisim liklik mani tasol bilong mekim planti kain wok long autim nius na tok save bilong ol dipatmen bilong gavman.

Planti pipel na memba bilong palamen i bel nogut, long wanem, tok na tok save bilong gavman i no save kamap long ples. Na sapos ol pipel nating long ples i no save gavman i mekim wanem wok, na watpo em i mekim wok bilong em, bai kantri i no inap ran gut. Mista Koraea i tok olsem: Nau gavman i givim em 90 toea tasol long givimaot olkain nius samting long wan wan manmeri long PNG. Em i liklik nating.

Opis ov Infomesen bilong dipatmen bilong Mista Koraea i save kisim K2,300,000 tasol olsem Baset long wan yia. Na wantu K1,000,000 (wan milion) kina i lus long baim 291 wokman bilong dispela ofis. Olsem na K1,300,000 tasol i lep long mekim olgeta wok bilong rait na prin na muvi na kain wok olsem bilong autim tok long ol pipel. Mista Koraea i bel nogut long dispela na i ting gavman i pasim han na maus bilong dipatmen bilong em. Olsem na em i no inap mekim gut wok bilong em.



Lukim gut tru dispela tupela piksa. I gat 10-pela samting i narakain narakain long tupela. Yu inap painim ol?



SIK "SMOL POKS" PINIS

Moa olsem 12,000 helt wokman bilong kantri Bangladesh long Esia i bin painimaut nau i no gat moa dispela strongpela sik ol i kolim "smol poks" long kantri bilong ol. Em i las kantri i gat dispela sik. Ol i bin wok wantaim bikpela Helt Asosiesen bilong Yunaitet Nesens (ol leta bilong em WHO). Na nau i luk olsem dispela sik i laik pinis long olgeta kantri long graun, na yumi no mas kisim moa wampela strongpela sut ol i kolim "veksinesen" sapos yumi laik go raun long ol arapela kantri. Dispela sik i save mekim bikpela mak nogut long pes na bodi bilong manmeri i kisim.

Maxell i nem yu ken bilipim. Baim em tasol.



YU KEN BAIM LONG OL DISPELA HAGEMAYER STUA

P.O. Box 673, MADANG
PHONE: 822445

P.O. Box 1428, BOROKO
PHONE: 256144

P.O. Box 90, LAE
PHONE: 423200

P.O. Box 63, RABAU
PHONE: 922633

P.O. Box 11, MT. HAGEN
PHONE: 52 1339

Dispela em i stori bilong wanpela katekis bipo tru long Sepik antap. Em i soim olsem wanem em i bin kamap namba wan taim na wokim skul na resis wantaim pasin tambaran.

Mipela i painim dispela stori long wanpela olupela buk long Jemani na Pater J. Tschauder, em i stap liv nau, i tanim long tok Pisin.

Hamaija



stori bilong katekis bipo

No gat man i slip long Yessan long dispela nait. Bel bilong ol i tait nogut. Ol i wetim bikpela trabel i kamap. Wanem kain trabel? Husat i laitim paia? No gat man i go long wok. Ol i stap long haus tasol. Long wanem dispela trabel i bikpela moa na i no lusim kwiktaim tingting bilong ol.

WET NATING

Wanpela de i go pinis na wanpela nait, nau Hamaija i kam bek long Yessan. Hia em i harim gen dispela stori bilong diwai tambu i paia. Em i harim na em i tingting planti. Bihain em i askim namba wan bilong ol lapun, "Na tok bilong yupela, dispela ples hia Yessan bambai i lus sapos diwai tambu i bagarap, em olsem wanem? Em i tru o nogat? Lukim, yumi olgeta i stap yet! Nating tok ya i no tru."

Ol lapun i harim na tingting bilong ol i sek liklik. Nating dispela Hamaija i tok stret? O em i tok giaman tasol? Nau sampela man i tokaut stret, "Dispela tok bilong tambaran i tok giaman tasol." Sampe-

la tasol i tingting planti i stap.

KRU KAMAP

Hamaija i go kisim wanpela kru bilong banana na planim em long ples stret as bilong diwai tambu bipo i sanap na nau pipia tasol bilong paia i stap. Em i pasin bilong pipel bilong Niugini: planim samting namel long sit bilong paia bilong diwai i kuk pinis bambai em i kamap gutpela moa yet.

Longtaim bihain long Wanpela taim long mun

dispela paia, ol pipel bilong Yessan i no moa tok-tok long diwai tambu na tambaran. Nau Hamaija i autim stori tru long ol lapun. "Tru a, yu laitim paia hia na yu no indai a?"

Dispela stori i bikpela tumas na ol i no ting long bekim long Hamaija. Ol i kalap nogut long strong bilong katekis bilong ol na ol i laikim em, long wanem em i draipela man tru, dispela Hamaija.

PULIM KANU

Hamaija i pulim kanu bilong em i go long Marui. Long Marui, Pater i stap, na Pater i singautim olgeta katekis bilong em i kam long bung na mekim sarap liklik, skul-liklik na konprens. Hamaija i wok longwe liklik. Inap long tupela de em i pul bilong kamap long Marui. Tasol i no hatwok, long wanem em i go daun na Sepik i helpim em. Go bek tasol i hatwok moa. Pastaim ol pipel bilong ol ples arere long riva i no save givim kaikai long em, long wanem ol i no save long em. Hamaija i stori olsem: "Tru, san i go daun na mi stap long hap rot. No gat kaikai, mi hangre nogut. Na mi pret. Nau mi ting long Jisas, em tu i pilim hangre long wok bilong em. Mi holim wok bilong em, mi ting olsem. Na maski mi ken hangre liklik, samting nating."

Mi pater bilong harim dispela tok na mi amamas tru. "Tru," mi tok long tingting bilong mi, "mi gat 100 katekis, tasol nating Hamaija wanpela inap long tingting olsem.

Bihain Hamaija i save pul i go long Marui na i no hangre moa. Ol pipel bilong olgeta viles i stap long rot i save long em, em i

pren bilong ol.

GUTBAI

Sampela katekis i go antap long Sepik wantaim Hamaija, ol i lusim wok bilong ol, kontrak i no pinis yet, Tasol Hamaija i no olsem. Em i pinisim kontrak bilong em i gat 5 yia. Taim bilong tok gutbai na sekan i kam, na bikpela hevi i kam long olgeta manmeri na pikinini, bikpela hevi olsem long taim hetman bilong ples indai. Ol meri i penim skin bilong ol long graun olsem ol i mekim taim ol i krai long man indai. Ol pikinini i krai, krai, holim han bilong em, holim lek bilong pasim Hamaija na em i no ken kalap long bot,

Ol man i sanap lukluk longwe i stap. Bel i pas na i hevi tru. Pater i lukim na i laikim, long wanem, dispela kain gutbai ol i givim long Hamaija i win moa yet long olgeta ripot mi ken raitim long pepa. Hamaija i mekim gutpela wok tru bilong Jisas. Narapela katekis i skruim wok bilong Hamaija long Yessan, na Hamaija i go painim nupela ples bilong wok.

(Stori i pinis nau.)

BAIM WANTOK

Sapos yu laik kisim WANTOK niuspepa i kam long yu stret olgeta wan wan wik bilong dispela yia, yu katim dispela tiket long sisis na salim i kam wantaim K8.00.

NEM BILONG YU:

ADRES BILONG YU:

Salim sek o mani oda inap long K8.00 wantaim dispela tiket i kam long:

**WANTOK
BOX 1982
BOROKO**

Sapos yu bilong wanpela skul o misin o grup na yu laik kisim moa olsem 10-pela WANTOK wantaim long olgeta wan wan wik, orait yu rait na askim mipela long spesel prais mipela i gat long man i baim planti WANTOK olsem.




**MIPELA GAT SAMPELA
SPESEL BALUS BILONG
KARIM KAGO**

EM HIA KAGO BILONG WANPELA BALUS

**Sapos yu laik samting i kamap hariap
orait, yu putim long balus tasol**

TOK SAVE BILONG BIA FAKTORI

Insait long buk i givim tok save bilong wampela bikpela breweri long Port Moresby (em faktori bilong wokim bia) yu ken painim ol dispela namba:
 3,300,000 - em i namba bilong galon bia ol inap wokim long wan yia long faktori long Port Moresby. Lai i gat narapela.
 K16,000,00 - em i ol takismani, bia na wok bia bilong dispela kampani i givim long gavman insait long wan yia
 633 - em i namba bilong wokman bilong dispela faktori
 6,000 - em i namba bilong olkain wok, bia i save givim long ol man nabaut - olsem trakdraiva, stuakipa, boskru.
 90.7 % - (em i 90 sea bilong olgeta 100 sea) bilong kampani i stap long han bilong ausait kantri
 9% - (em i 9 sea long olgeta 100 sea) bilong kamapni i stap long han bilong ol Papua Niugini
 K36,500,000 - em winmani gavman i bin kisim long dispela bia faktori namel long yia 1960 na 1976.



.....las dring bilong em.....

WEWAK WIN MOA

Long "Is Sepik Nius" mipela i bin painim liklik banis i gat olkain namba bilong tokaut hamas bia i save kamap long Wewak long wan wan mun. Ol dispela namba i kamap long kastam, i save ripot long olgeta samting i kamap long ol bikpela sip i karim kago i kam long Wewak.

Wewak, em i no bikpela ples. Ol i tok em i gat 12,000 pipel samting. Orait, nau yu lukim hamas katen bia i save kamap long Wewak long wan wan mun, stat long Septemba 1976 i go inap Ogas 1977.


Septemba	28,312	Mas	18,833
Oktoba	25,688	Epril	17,724
Novemba	32,066	Me	17,436
Desemba	14,880	Jun	23,106
Januari	24,392	Julai	18,528
Februari	12,288	Ogas	53,136

Long dispela ol namba yu ken painimaut olsem:
 ...Insait long wan yia 1976/77 i gat 286,389 katon bia i kamap.
 ...Em i min ol pipel i bin lusim klostu K3,000,000 (3 milion kina) long bia.
 ...Em i min Is Sepik Provins i bin winim samting olsem K1 milion long takis.
 ...Em i min em inap bia long wan wan man na meri na pikinini long Is Sepik Provins i ken kisim 35 botol bia.

AVELING-BARFORD PACIFIC
 for your compaction requirements.

- Vibratory Plates
- Vibratory Rammers
- Pedestrian Vibratory Rollers
 (Double drum hydrostatic drive)

Agents for bearings and hose fittings Ryco-flex Nachi



AVELING-BARFORD PACIFIC PTY. LTD

Head office: Ume Street, Gordons, Port Moresby. Port Moresby.

PO Box 6457. Phone 257166 Telex NE22206

Lae depot: Morobe Avenue, PO Box 1191, Lae Phone 424188 Telex NE42411



BEKIM 3-PELA TOK

Dia Edita - Mi laik bekim pas bilong Mista Michael Manuel Katnau. Yu bekim pas stret long Mista Noeline T. Bidau wantaim mitupela tasol wanpela samting yu kranki olgeta yu raitim 3-pela kwesten long askim mitupela, orait mi Andrew Aipies i ken bekim 3-pela kwesten bilong yu.

Namba wan kwesten i go olsem. Yu tok long mitupela i go long olgeta provins na kauntim olgeta katekis a? Orait mi bekim. Mitupela i no olsem God. Mitupela i man bilong graun. Mitupela inap raun long olgeta provins na kauntim olgeta katekis olsem wanem, mitupela i no save. Mitupela i lukim long ai bilong mitupela na rait tasol i go long Wantok niuspepa. Dispela ensa i sem long namba wan kwesten yu lukim.

Em tasol wari bilong yu, mi bekim long dispela pas, yu rit gut.

Mi bilong Enga Provins. Enga Provins i gat 15-pela peris i stap na mi lukim planti katekis i no stret long wok bilong God. Mi lukim wan wan tasol i holim wok bilong God. Olsem na mi ting olgeta provins i mekim olsem long wok bilong God. Mi rait tasol i

go long Wantok niuspepa na yu bekim.

Namba tu kwesten bilong yu. Yu tok long mitupela olsem: mi raitim ensa tasol yu lukim. God i wokim Adam na Iv, olsem na mipela olgeta i kama long laip bilong God tasol. God yet i laikim wanpela man, em i ken salim Holi Spirit na givim gutpela tingting long em. Mitupela i no save. God wanpela tasol save.

Namba tri kwesten bilong yu dispela mi raitim ensa tasol yu lukim. Olgeta katekis i mekim rong orait mi rait.

Andrew Aipies, Wapenamanda/Enga



SODAIM TIT

Dia Edita - Mi laik autim wanpela wari bilong mi long dokta i save lusim na sodaim tit. Wari bilong mi i go olsem.

Bipo long yia 1977. Mi stap long Port Moresby.

Na mi go long haus sik na ol dentis i lusim tupela tit bilong mi. Na mi no baim long bikpela mani. Nogat ya. Mi baim olsem 30 toea.

Tasol mi kam long Maun Hagen haus sik na ol dentis man i sodaim tupela tit bilong mi na i gat liklik hul. Man ol i kostim mi long K5. Tasol dispela K5 i no stret long tupela liklik samting ya. Em i antap tru i winim sampela bikpela samting i go daun long K2 na K3. Yupela i mas stretim pastaim. Dispela K5 i ova tru long liklik samting yupela i save putim long tit. Na dispela i hevi tru.

Levi Mika, Buang/Morobe

OPOSISEN PAINIM LIDA

(i kam long pes 3)

Kunangel (Angalimp-South Wahgi), Mista Tom Amaiu (Kompam-Ambun), Mista Torato (Enga), Mista Pundia Kange (Ialibu-Pangia), Mista Raphael Doa (Western Highlands), Mista John Laka (Kandep), Mista Parua Kuri (Dei), Mista Billy Hai (Okapa).

I gat 5-pela memba bilong Oposisen bilong bipo ol i no bin bihainim wanpela sait yet. Em nem bilong ol: Mista Wesley Embahe (Northern), Mista Roy Evara (Kikori), Mista Akepa Miakwe (Ungai-Bena), Mista Walla Gukguk

MASKI BIHAINIM LIDA

Dia Edita - Mi i gat wanpela strongpela wari na bel na het bilong mi i pen olgeta. Wari bilong mi i go olsem. Mi lukim na harim planti loman bilong gavman na tu sampela nesanel palamen memba.

Ol i save grisim planti yangpela meri nabaut na paulim ol gut tru. Na ol i save dabolim 3 o 4-pela bilong ol yet. Tasol ol i gat namba wan olpela meri bilong ol i stap. Tasol em i save krai krai nabaut na mi save sori long ol.

Wataim ol pipel long ples

i harim na lukim ol loman i mekim olsem. Na tu ol i laik bihainim laik bilong ol. Na mi harim na lukim sindaun bilong ples em i bagarap na sting olgeta.

Na mipela ol pipel i save givim vot. na makim ol long lukautim mipela pipel tasol. Mi yet mi i no klia na save gut long lo bilong gavman na askim yupela. Yupela save long kain lo long wanpela hap o nogat. Tenkyu.

Moses Donald Ipuia, Porgera/Enga.

ET POS ODELI


(i kam long pes 7)

stap wok long Timbunke, Dokta Farrell i givim gutpela tok amamas long ol studen. Na Interim Primia bilong Is Sepik, em Pater Kerubim Dambui, i ritim tok bilong memba bilong palamen, Mista Bill Eichorn, long wanem ka bilong em i planim long rot i malumalu na i no inap kama.

Bihain Pater Dambui i bin mekim Misa wantaim Pater Leo v.d. Helm. Pater Dambui i amamas tru, long wanem Timbunke em i as ples bilong em. Na long lotu em i givim gutpela skul long ol odeli na i tokim ol, ol i mas bihainim gutpela wok Jisas i mekim, taim em tu i raun na oraitim planti sikman. Long dispela lotu yet, ol odeli i mekim promis long holim gut wok bilong ol. na ol i sainim setifiket bilong ol antap long alta yet.

Bihain long lotu ol bikpela man bilong ples i kirapim wanpela bikpela singsing. Ol Timbunke i bin givim wanpela kau, na Mindimbit wanpela wel pik, na Tambanum planti kaikai. Ol i singsing i go, inap long tulait.

Nau i gat planti yangpela man i aplai i laik kam stadi long et pos odeli long Timbunke. Long mun Jun bai ol i kisim 24 man moa long kam insait long trenning.



BS BRIDGESTONE

LUKIM DISPELA MAK
EM I MAK BILONG

Namba Wan Taia

Bilong P.N.G.

N.G.G. TRADING COMPANY
P.O. BOX 459,
LAE.
PH. 42 3122

OL SNEK I KAMAP


(Namba 16: 5 - 21: 6)

Kora wantaim sampela pren i laik rausim Moses olsem lida. Moses i putim kibung na i tok tumora bai God yet i soim em i laikim husat i lida. Orait ol i sanap wet nau...



Yupela olgeta i klia long Kora wantaim ol man bilong em. Nogut yupela tu i lusim laip bilong yupela. Sapos God i makim mi olsem lida, orait, graun i ken op na daunim ol dispela lain man....

Moses i tok yet na guria i kamap na graun i op na ol haus set bilong Kora na ol poroman bilong em i pundaun insait i lus.



Ol pipel i pret na ol i go bek long Moses. Olsem God i tok, em i bringim ol i go bek long ples wesan, longwe long Kenan. Ol i raun nabaut nabaut inap planti yia moa.



Sapos taim nogut i painim ol, ol i lusim ting long dispela samting: em i asua bilong ol yet, ol i lusim gutpela kantri Kenan. Planti taim moa ol i komplem tasol..



No gat wara. Nau mipela mekim wanem?

Hul wara i drai pinis. Bai mi kukim kaikai olsem wanem?

Ol lida bilong mipela bai tokim Moses.




Orait, Moses, nau mipela we?

Maski, yumi go bek long Isip. Isip i gat wara.

Wantaim moa Moses na Eron i go beten long God na i askim em ol i mas mekim wanem samting.



Tasol nau Moses tu i belhat long ol pipel na em i sakim tok bilong God na i paitim ston tupela taim. God i tok em i no ken paitim. Tasol wara i kamap na ol pipel i dring na i belgut.




Tasol God i no laik. Olsem wanem ol pipel i mas harim tok na Moses na Eron i no harim? Orait, nau God i tambuim tupela long go insait long kantri Kenan.

Ol Isrel i wokabaut i kamap long Maunten Hor. God i tokim Moses olsem, bihain liklik bai Eron i dai. Olsem em i mas bringim Eron na pikinini bilong em Eleasa i go long maunten.

Eron, bai Eleasa i kisim ples bilong yu olsem bikpris. Mi putim klos bilong yu long em.



Eron i dai na ol Isrel i krai long em inap 30 de. Bihain ol i kirap i go gen. Na klaut i go pas long ol long san na long nait.



Tasol i no longtaim na ol pipel i lusim ting na i kirap komplem gen..

I no gat wara gen. Nek bilong mi drai.

Oltaim inap nau God i bin givim wara long yumi...

Yes, tasol, dispela kaikai. Mi les pinis long en. Mi laikim narakain kaikai olsem mipela i gat long Isip - ol melen na anien na prut...


Tasol long Isip yupela i wokboi nating. Ol i paitim yu. Na yu laik fri.



Na yu yet i tok God bai mekim mipela i fri. Tasol mipela i raun raun tasol.. mipela i no fri, mipela i kalabus long ples wesan...

Wantu God i mekim save long ol Isrel long dispela tok. Kem i pulap nau long ol snek nogut i gat pait.


Snek i kaikai mi...



Used by permission of the David C. Cook Foundation. Copyright 1973, David C. Cook Publishing Co. All rights reserved.

SPIT NA SPAK I KILIM MAN

LUKIM GUT DISPELA POTO OL PLISMAN I KISIM



NOGUT NEKS TAIM EM I YU TASOL